
ВИЛОЯТ КЎП ТАРМОҚЛИ ТИББИЁТ МАРКАЗИ ҲАМДА ВИЛОЯТ ЭНДОКРИНОЛОГИЯ ДИСПАНСЕРИГА 15 ТА ЯНГИ ГЕМОДИАЛИЗ АППАРАТИ ЎРНАТИЛИБ, ГЕМОДИАЛИЗ БЎЛИМЛАРИ ТАШКИЛ ЭТИЛДИ

Фарғонада сурункали буйрак етишмовчилиги билан оғриган ва ногиронлиги бўлган шахсларнинг гемодиализ хизматида бўлган эҳтиёжини қондириш мақсадида вилоят маҳаллий бюджетидан ажратилган 2 млрд 300 млн сўмдан зиёд маблағ эвазига Германиядан 15 та гемодиализ аппарати олиб келинди. Натижада Фарғона шаҳридаги вилоят кўп тармоқли тиббиёт маркази қошида 10 та ҳамда вилоят Эндокринология диспансери қошида 5 та гемодиализ аппаратларга мўлжалланган “Экстракорпорал детоксикация” (гемодиализ) бўлимлари ташкил этилди ҳамда Туркия ва Россиянинг техник мутахассислари жалб қилинган ҳолда жиҳозлар ўрнатилиб, синовдан ўтказилди.

Бугун бўлиб ўтган янги бўлимларнинг очилиш маросимида вилоят ҳокимининг ўринбосари Файзулло Қосимов, вилоят соғлиқни сақлаш бошқармаси раҳбарияти ҳамда кенг жамоатчилик вакиллари қатнашдилар. Сўз олганлар тиббиётдаги ислохотлар аҳоли саломатлигини мустаҳкамлашда муҳим аҳамият касб этишини таъкидладилар. Рамзий тасма қирқилиб, иштирокчилар беморларга яратилган шароитлар билан танишдилар.

“Вилоятда бугунга қадар 22 та гемодиализ аппарати бўлган. Энди уларнинг сони янада кўпайди. Бу эса вилоятимизда диспансер назоратида турган 120 нафар беморга қулайлик яратди. Бошқа вилоятлар ёки давлатларга бориб даволанаётганларнинг узоғи яқин бўлди. Ҳозирда Фурқат, Бағдод ва Марғилон шаҳарларида қўшимча гемодиализ аппаратларини ўрнатиш билан бирга туманлараро ихтисослашган тиббий ёрдам кўрсатиш бўлимларини ташкил этиш ҳам режалаштирилган”, - деди вилоят кўп тармоқли тиббиёт маркази бош шифокори Одилжон Умаров.

Бизни ижтимоий тармоқларда кузатинг [Facebook](#),
2021-03-30 18:53:16